



## **1. Wat huet den Eenzelnen vun der Fusioun an wat sinn d'Haaptargumenter fir eng Fusioun?**

Um qualitative Plang, erméiglecht eng Fusioun eng besser intern Opstellung vun der Gemeng an doduerch ee verbesserte Service fir all Eenzele sief dat um Niveau vun der Verwaltung oder dem Atelier technique. Doriwwer eraus huet eng Fusiounsgemeng um quantitative Plang de Virdeel dat se iwwer méi finanziell Moyene verfügt an sech doduerch souwuel infrastrukturell wéi och administrativ besser opstelle kann, an dat queesch duerch hier obligatoresch an net obligatoresch Servicer vu Schoul iwwer Maison relais bis Sport a Kultur.

## **2. Wat ass den Virdeel vun enger Fusioun fir Bous an wat bréngt se dem Bousser Bierger kuerz bis laangfristeg?**

De Moment si béid Gemengen esou opgestallt dat se all hier obligatoresch Missiounen erfëlle kënnen. Bei béide Gemengen ass dës Potential awer ausbaufäeg an dat souwuel um Niveau vun de Servicer wéi och vun den Infrastrukturen. An Zukunft wäerten och fir d'Gemeng Bous nei Oplagen dobäikommen an sech d'Erwaardungshaltung vu Säite vum Bierger änneren. Eng Fusioun huet net als direkt Zil eventuell Defiziter wéi feelend an adequat Sport- a Kulturinfrastrukturen ze kompenséieren, mee erméiglecht de Gemengen sech am allgemenge laangfristeg besser opzustellen an dës souwuel um administrative wéi um infrastrukturelle Plang. Déi am Kader vun der Fusioun opgestallte Stärkten-Schwächen-Analysen huet et erméiglecht d'Defiziter a béide Gemenge festzustellen (kuckt dofir och SWOT-Analysen pro Ressort) an op Basis dovun gouf ee Masterplang fir d'Fusioun ausgeschafft deen eng kohärent an zukunftsorientéiert Investitiounspolitik erméiglecht.

## **3. Wat sinn d'Visiounen fir eng zukünfteg Fusiounsgemeng an wéi gëtt s'ëchergestallt, dat déi staatlech Subsidien nohalteg investéiert ginn? Ginn d'Investitiounen gläichméisseg op déi zwou Ursprungsgemengen verdeelt?**

Am Kader vum Masterplang sinn d'Visiounen vun den zwou Gemengen fir d'Zukunft festgehalen ginn an duerno gekuckt ginn wéi een déi bestoend Ressource vu béide Gemengen optimal dofir asetzen kéint. Am Sënn vum Fusiounsgedanken goung et hei drëm eng beschtméiglech zukünfteg Fusiounsgemeng opzustellen an dës onofhängeg vun de geographesche Gegebenheeten. Doriwwer eraus gesäit den Masterplang awer Investitiounen a gläicher Héicht op béide Gebidder vun den ale Gemenge vir.

## **4. Wéi laang dauert den Prozess?**

Nodeems dat d'Schäfferéit am Hierscht 2018 den Optrag kruten de Fusiounsprojet auszuschaffen, gëtt d'Fusioun 2022 an engem definitive Vote vum Gemengerot gestëmmt an dës op Basis vum Ausgang vum Referendum. Duerno gëtt d'Gesetz vun der Fusioun Bous-Waldbriedemes ausgeschafft, an der Chamber gestëmmt an trëtt dann viraussichtlech den 1. September 2023 a Kraaft. Domat ass den Fusiounsprojet awer net ofgeschloss a béid Gemenge mussen zesummewuessen. Dofir hunn sech d'Schäfferéit fir déi grouss Linnen op ee gemeinsame Masterplang fir d'Fusioun geeenegt deen et duerno gëllt ëmzesetzen.

## **5. Wat sinn d'Nodeeler vun enger Fusioun?**

Eng Fusioun kann den Nodeel um politesche Plang hunn, dat net all Mandataire an enger zukünftiger Fusiounsgemeng zréckgewielt gëtt. Dës kann awer och ee Virdeel fir de Bierger sinn; wann déi politesch Konkurrenz wisst, kann et doduerch zur Stärkung a Professionaliséierung vum politeschen Engagement kommen.

## **6. Firwat goufen net méi Gemengen an den Fusiounsprozess mat agebonnen fir esou och d'Representativitéit vun der Fusiounsgemeng ze stärken?**

Wat méi Gemengen eng nei Fusiounsgemeng, mat dann enger méi héijer Awunnerzuel, bilden, wat de regionalen Impakt an doduerch den Afloss op déi national Entitéite wiißt. Am Kader vun dëser Fusioun gouf mat den Nopeschgemenge geschwat a laangfristeg wäert et och zu erweiderten, politesch motivéierten, Fusioune komme mussen. Deen Moment huet eng scho bestoend Fusiounsgemeng de Virdeel vum méi héije politesche Gewiicht.

## **7. Wéi wäert den Numm vun der zukünfteger Gemeng gewielt ginn?**

No engem positive Referendum wäert den Numm vun der zukünfteger Fusiounsgemeng op Basis vun verschiddeenen Proposen an am Austausch mam Inneministère am Fusiounsgesetz niddergeschriwwen ginn.

## **8. Wat geschitt wann de Referendum an enger Gemeng negativ ausfällt an ass den Referendum nëmmen een Showprozess?**

Wéi an der Äntwert op d'Fro 4 hei uewendriwwer ausgefouert, kënn et nom Referendum zu engem definitive Vote vun der Fusioun duerch déi zwee Gemengeréit an deem sech all Gemengerot op den Ausgang vum Referendum an senger Gemeng stëtzt.

## **9. Firwat goufen d'Analysen net éischer zougänglech gemaach an firwat si bis haut keng Aarbechtsgruppen mat de Bierger agesat ginn (participativ Demokratie)?**

D'Bestands- an d'Stärkten- a Schwächenanalyse vun den zwou Gemengen ass op den éischte Biergerversammlungen dem breede Public virgestallt ginn, wou dësen sech aktiv duerch Froen an Virschléi abréngen konnt an och duerno nach reagéieren konnt. Pandemiebedingt goufen nëmmen dräi Aarbechtsgruppen zu den verschiddeenen Gemengeressorten gebilt fir een méiglechen Masterplang zur Fusioun opzezeechnen an sech fir d'Méiglechkeet vun der Onlinepartizipatioun fir den Bierger entscheet. Domat ass den Prozess vun der Zukunftsgestaltung vun der neier Gemeng awer net ofgeschloss an et wäerten weider Aarbechtsgruppen no der Fusioun gebraucht ginn an dëst ënner anerem och a Form vun berodenden Kommissiounen.

## **10. Gouf och no den Besoien vun den Jonken gekuckt an wéi steet et ëm d'Jugendhaus?**

Bei der Ausaarbechtung vum Fusiounsprojet gouf keng Altersgrupp vernoléisseg. An den verschiddeenen Aarbechtsgruppe goufen d'Besoine vun all Eenzeler festgestallt an entspreichend Budgeten och nieft der Ëmsetzung vum Masterplang am fiktive Méjioresplang virgesinn.

## **11. Wou kéint een flott Plazen an lieux de rencontre fir Jonk an Aal amenagéieren?**

Plaz fir den Amenagement vun öffentleche Plaze fir all Interessegruppe ginn et eng ganz Partie an der neier Fusiounsgemeng. Mat den duerch d'Fusioun gestärkte Gemengefinanze ginn dës Projekte kuerzfristeg finanzéierbar an doduerch realisabel.

## **12. An verschiddeenen Dierfer sinn keng Spillplazen ?**

Duerch en Méi un Einnamen deen eng Fusiounsgemeng generéiert, sinn zousätzlech Ausgaben zum Bau vun neie Spillplaze méiglech. Am fiktive Méjioresplang vun der Fusiounsgemeng sinn hei och schonn konkret Budgete virgesinn an d'Installatioune kënnen esou kuerzfristeg en place gesat ginn.

## **13. Gëtt bei der Fusioun och un d'Mënsche geduecht, déi an de Gemenge liewen oder geet et just ëm Gebaier an ëm déi Leit, déi am Moment op de Gemenge schaffen? Fir mech ass de Fusiounsossier aus Siicht vun engem Bierger ganz moer an zimmlech eidel. Traureg fannen ech nach, dat de Büro MC Aarbecht mécht, déi een esou kann op egal wéi enger Plaz ka maachen, och ouni vill dovun ze kennen a gutt dofir remuneréiert gëtt. Wat dat kascht weess keen (Fro an der Versammlung zu Bous) oder wëll et net soen. Dat Ganzt kann ee jo mat Copy&Paste op egal wéi eng Gemengen kopéieren. Gebaier kucken, e puer Zuelen am Budget nosichen.**

D'Offer déi eng Gemeng hiren Awunnerbidde kann spigelt sech zum engen an de Gemengeservicer an zum aneren an hiren Infrastrukturen. Am Kader vun der Opstellung vum Masterplang fir d'Fusioun ass gekuckt ginn dës Offer op béiden Niveaue beschtméiglech fir de Bierger ze gestalten an auszebauen, esou dat all Eenzelen dovun profitéiere kann. Fir d'Opstelle vum Masterplang

mat Bestandsopnam an dozougehéiereger Stärkten- a Schwächenanalysen hunn d'Schäferéit ee pluridisziplinäre Bureau gesicht deen all déi néideg Kapassitéite mat sech bréngt a schonn Erfahrung a Referenzen an dësem komplexe Beräich huet. D'Lëtzebuurger Gemengen änelen sech an dach ginn et erheblech Ënnerscheeder an dat virun allem um Niveau vun den Awunnerzuelen an hirer Mixitéit, dem Fonctionnement vun de Verwaltungen, de Finanzen, den öffentlechen Infrastrukturen, etc.. D'Kärkompetenzen déi fir d'Opstelle vun dësem Masterplang néideg waren, waren d'Berechnungen, op Basis vun den urbanisteschen Donnéeën, vun de spezifischen demographesche Modellen an der domat zesummenhänkender Entwécklung vun den Altersgruppen; Expertise am Beräich vum Fonctionnement vu Schoulen, Services d'accueil an hire Maximalkapassitéiten; d'Bauingénierie fir déi bautechnesch Bestandsopnam vun de Gebailechkeeten an d'Kalkulatioun vun de Sanéierungs- an Ausbaukonzepter an d'Berechnung vun der finanzieller Machbarkeet vum Gesamtprojet.

#### **14. Gouf d'Iwwerschwemmungsproblematik am Kader vun der Fusioun traitéiert?**

Bei der Iwwerschwemmungsproblematik brauch et kohärent Moosnamen an dat iwwergräifend an all de concernéierte Gemengen déi am Dall leien. Zesummen kann een konkret Mesuren ugoen, déi um Terrain vun deenen zwou alen Gemengen leien an dës Investissementer ginn duerch den méi héijen Budget vun enger Fusiounsgemeng méi séier méiglech. Entsprechend Budgete goufen och am Méijoresfinanzplang vun der Fusiounsgemeng virgesinn.

#### **15. Ass no der Fusioun geplangt eppes um Offallkonzept ze änneren?**

D'Offallkonzepter vu béide Gemenge müssen no der Fusioun harmoniséiert ginn an d'Offalltaxen duerch den neie Gemengerot ugepasst. Wéi dat neit Offallkonzept ausgesäit ass Kompetenz vun neie Gemengerot.

#### **16. Est-ce qu'il y aura une seule maison communale et dans l'affirmative à Bous ou à Waldbredimus?**

Dans le cadre de la fusion il est prévu d'aménager l'ancien presbytère à Waldbredimus en tant que nouvelle Mairie. Le presbytère, qui est inscrit à l'inventaire supplémentaire des monuments nationaux, donne un caractère représentatif à la nouvelle maison communale et sera complété par une extension moderne et fonctionnelle dans le bâtiment annexe.

#### **17. Kënnt déi néi Gemeng definitiv an d'Paschtoueschhaus zu Waldbriedemes an wat waren d'Krittäre fir dës Entscheedung?**

Am Kader vun der Fusioun solle béid Gemengeverwaltungen an der geographescher Mëtt vun der zukünftiger Fusiounsgemeng zu Waldbredimus zesummengefuert ginn. D'Paschtoueschhaus, wat am Inventaire supplémentaire vun den nationale Monumenter gelëscht ass, bitt dem Gemengenghaus zum engen de representative Charakter deen eng Gemeng soll hunn an zum anere kann d'Niewegebai funktional ausgebaut gi fir enger moderner Gemeng gerecht ze ginn an den Ufuerderunge vun Bierger an dem Personal ze entsprechen.

#### **18. Gëtt et eng Reegelung fir den aktuellen Parking zu Waldbriedemes wann d'Gemeng dohin kënnt?**

De Wee vun engem Gemengereglement oder Barrièren ass eng Méiglechkeet. Do dernieft ginn et op dësem Site weider Méiglechkeete Parkraum ze schafen.

#### **19. Wéi kann déi motoriséiert Mobilitéit an der Gemeng fir Bierger ouni Autosächergestallt ginn an sinn zousätzlech Angeboter wéi z.B. den Nightrider geplangt?**

Doduerch dat eng Fusiounsgemeng duerch d'Gemengefinanzéierungsgesetz méi ordinären Einnamen zur Verfügung huet, sinn zousätzlech Ausgaben um Niveau vun der kollektiver Mobilitéit méiglech. Dëst kéint zum Beispill en Ruffbus sinn.

#### **20. Sinn am Fusiounsprojet Vëlos- an Wanderweeër wéi z.B. den Vëloswee op Stadtbredimus virgesinn? Gëtt d'Mobilitéé douce an Zukunft besser promovéiert mat z.B. Vëlosstänneren virun den öffentlechen Gebaier?**

De Bau an Ausbau vun de regionale Vëlos- an Wanderweeër ënnerläit souwuel dem Bau- wéi och dem Tourismusministère. An der Vergaangenheet sinn et op dësem Plang schonn Ustrengeunge vun den zwou Gemenge ginn awer eng Fusiounsgemeng mat regionalem Impakt kann an esou Fäll besser Afloss op d'Ministèren an hir jeeweileg Méijoresfinanzpläng huelen.

Um lokale Plang kann eng Fusiounsgemeng duerch hier Mehreinnahmen zousätzlech Ausgaben um Niveau vun der doucer Mobilitéit direkt virgesinn an domat hier lokal Fouss- a Vëlosweeër ausbauen an och den entsprecheden Mobilier op öffentlechen Plazen zur Verfügung stellen. Doriwwer eraus sinn entsprechedend Budgeten am fiktive Méjioresfinanzplang vun der Fusiounsgemeng virgesinn.

### **21. Wat ënnerhëllt d’Fusiounsgemeng am Kader vum öffentlechen Transport an ginn d’Buslinnen bis an d’Stadt weider ausgebaut?**

D’Organisatioun vum RTGR ënnerläit dem Transportministère, eng Fusiounsgemeng mat regionalem Impakt huet besser Méiglechkeeten bei besotem Ministère ze intervenéiere wéi béid Gemengen eenzel.

### **22. Est-ce que tous les employés communaux seront repris et est-ce que le personnel restera le même?**

À ce point, la fusion n’aura pas d’impacts sur le personnel communal à part d’éventuelles réaffectations dans le cadre de la réorganisation des services.

### **23. Firwat sinn bis 2030 weider Recruterementer beim administrativen Personal virgesinn wann duerch d’Fusioun Synergien sollen entstoen?**

Duerch déi iwwerdurchschnëttlech Bevölkersentwécklung a béide Gemengen an déi ugeduechte Kreatioun vun neie Gemengeservicer muss méttelfristeg méi Personal agestallt ginn. Duerch d’Synergien déi sech awer duerch eng Fusioun um Niveau vun der Administratioun erméigleche wäert den Effektiv un Neistellungen awer manner héich si wéi wann béid Gemenge weiderhin géifen eenzel funktionéieren.

### **24. Wat hunn d’Gemengen mat deenen dräi Kierchen wëlles an ass eng Reaffektatioun vun dësen fir weltlech Zwecker virgesinn?**

D’Besetzverhältnissen verbonne mam Ënnerhalt vun de Gebailechkeete muss gekläert sinn, fir eng Reaffektatioun vun den Gebailechkeeten ze erméiglechen. Doriwwer eraus sinn d’Kierche vun Trënteng a Waldbredimus awer als monuments nationaux gefouert an ënnerleien deemno och dësem Schutz.

### **25. Ginn d’Bautereglementer ugepasst?**

D’Bautereglementer vu béide Gemenge mussen no der Fusioun vereenheetlecht ginn an an engem gemeinsamen allgemenge Bebauungsplang „PAG“ zesummeffléissen.

### **26. Ass virgesinn d’Schoulgebaier an d’Schoulhäff ze sanéieren?**

Béid Schoulgebaier sinn an engem allgemeng gudden Zoustand a klenger Renovatiounsaarbechten stinn am Méjioresfinanzplang. Do dernieft sinn awer kuerzfristeg keng gréisser Sanéierungsarbechten op béide Sitte virzegesinn, mee ee gemeinsame Budget géif et erméiglechen och gréisser Projeten oder Investitiounen, wéi z.B. d’Sanéierung vun de Schoulhäff, ze erméiglechen.

### **27. Wat ass beim Thema Sëcherheet vun den Gebaier an den öffentlechen Plazen geplangt, z.B. d’Spillplaz beim Kulturzenter?**

Duerch d’Fusioun stinn der Gemeng méi Einnamen zur Verfügung an doduerch sinn zousätzlech Ausgaben um Niveau vun der Sëcherheet, wéi zum Beispill engem vollzäit Sëcherheitsbeoptragten, méiglech.

### **28. Wéi gesäit d’Schoulorganisatioun vun der Fusiounsgemeng aus, ginn d’Kanner fir d’Schoulen op déi zwou Gemengen opgedeelt?**

D’Kanner wäerten och weiderhin hirem Wunnuert no an d’Schoul goen, ausser am Fall wou et u Klassen säll op deem engen oder anere Site sollt feelen. Eng entsprechedend Aarbechtsgrupp mat der Direction régionale wäert dës Méiglechkeeten analyséieren.

### **29. Sinn Verkéiersberouegungsmaassnahmen an der Fusiounsgemeng virgesinn fir z.B. d’Vitesse op den Hauptstroossen ze reduzéieren oder den Contournement vun Assel?**

D’Hauptstroossen (N&CR) a béide Gemengen ënnerleien de Ponts et chaussées an domat dem Transportministère. Dat selwecht gëllt fir d’Planung an den Bau vum Contournement Assel an den

Bau vun der zweeter Phase vum Contournement vu Bous. Eng Fusiounsgemeng kann éischer Projeten bei den Minsitèren beaflossen an des Weideren sinn kuerz- bis mëttelfristeg Mesuren am fiktiven Méijoresfinanzplang virgesinn.

### **30. Wéivill ass den Gesamtinvest vun all den Projeten deen op déi néi fusionéiert Gemeng géif an den nächsten Joren zoukommen? Wat bedeidt dëst um Niveau vun der Verschëldung an wéi soll dës ofbezuelt ginn?**

De Gesamtinvest vum Masterplang esou wéi an de Biergerversammlunge gewisen, beleeft sech op knapp 23 Milliounen Euro. Do derbäi kommen nach eng Kéier 37 Milliounen fir aner Projete wéi Fouss- a Vëlosweeër, Stroossen- a Kanalarbechten, Kläranlagen, divers Sanéierungsmesuren, Logementsprojeten, Verkéiersmesurë wéi «shared spacen», Kaf vun Terrainen a Gebaier etc.. Zesumme sinn dat Bruttoinvestitiounen vu knapp 60 Milliounen Euro an d'Zukunft. De fiktive Méijoresfinanzplang vun der Fusiounsgemeng op fënnef Joer, esou wéi en vum Inneministère fir Gemenge virgeschriwwen ass, berechent eng Nettoverschuldung am Joer 2026 vu knapp 14 Milliounen Euro bei engem Gesamtinvest op déi selwecht Period vu 55 Milliounen Euro wat enger pro Kapp Verschuldung vu knapp 4.000,- Euro 2026 entsprécht. Dës Neiverschëldung kann duerch déi mat den Zuele vum Inneministère errechent héich ordinären Einnahme vun enger Fusiounsgemeng vun 13 Milliounen Euro am Joer 2026 an engem duerschneittlechen ordinären Iwwerschoss vu knapp 2 Milliounen Euro séier ofbezuelt gi wëll dee Moment all déi néideg Infrastrukture bestinn. D'Finanzéierung vun de 60 Milliounen Bruttoinvestitiounen sinn esou nëmmen duerch eng Fusioun ze realiséieren.

### **31. Wéi gesäit et zäitlech aus fir déi verschidden Projeten ze realiséieren?**

No de leschte Referenze vu Fusiounen vun anere Gemengen, dauert de gesamte Fusiounsprozess, y inclus d'Realisatioun vum Masterplang, bis zu 10 Joer. Wann déi aktuell Pandemie net nach weider Joren unhält, kann een awer an dësem konkrete Fall dovun ausgoen dat de Prozess an der Period 2029 bis 2030 ofgeschloss ka ginn.

### **32. Wéi gesäit et mam Ausbau vum Glasfasernetz aus, kéint de Prozess duerch eng Fusioun beschleunegt ginn?**

Den Ausbau vum Glasfasernetz gëtt parallel mat de Stroossenaarbechte geplangt fir engem «double emploi» aus dem Wee ze goen. Generell kann eng Fusiounsgemeng solch Prozess awer an Zukunft beschleunegen duerch hieren gesteigerten Afloss och vis-à-vis vun privaten Fournisseuren.

### **33. Gëtt am Fusiounsprojet och erméiglecht dat sech méi Betreiber an der Gemeng usidelen resp. eng Zone artisanale geschaaf kann ginn?**

De Fusiounsprojet beinhalt net direkt d'Schafe vun neie Gewerbeflächen oder Zonen wëll dës Bestanddeel vum PAG an vun der Landesplanung mat den Plans directeurs sectoriels sinn. Vue dat no der Fusioun awer béid PAGen mussen zesummegeluecht ginn, ass dee Moment, an Zesummenaarbecht mam Landesplanungsminister an dem Inneminister, ze kucke wou esou Fläche kënne geschaf ginn.

Doriwwer eraus ass am Méijoresfinanzplang vun der Fusiounsgemeng awer Budget fir den Opkaf vun esou Flächen am Bestand virgesinn.

### **34. Wann d'Gemeng op Waldbredimus plënnert, wäerten dann Dependance zu Trënteng, Bous bestoen bleiwen, fir Bierger déi sech net deplacéieren kënnen oder keen Internet hunn?**

De Masterplang zur Fusioun gesäit keng Dependance fir. Fir de Gang op d'Gemeng awer esou einfach ewéi méiglech ze gestalten ass eng erweidert Digitalisatioun an Vereinfachung vun den Gemengeservicer virgesinn an, duerch déi méi héich Einnahmen, kann eng Fusiounsgemeng och Servicer wéi ee Ruffbus aféieren. Do dernieft kann ee mat dësen zousätzleche Gelder och ee Poste fir administrativ Hëllefstellunge schafen.

### **35. Wéi stinn déi finanziell Ausgaben momentan fir d'Fusioun, wie vill huet di Masterplansaarbecht kascht?**

D'Erstelle vum Masterplang zur Fusioun huet zwou Phasë beinhalt, déi qualitativ a quantitativ Bestandsopnam mat de Stärken-Schwächen Analysen an d'Erstelle vum Masterplang selwer mat de Sanéierungs- an Ausbaukonzepter, dem Reaffektatiounsprogramm an der Finanzéierungsstrategie an dëst an Zesummenaarbecht mat den dräi Aarbechtsgruppen. De Gesamtbudget fir d'Masterplansaarbecht fir déi zwou Gemengen beleeft sech op 120.000,- € a gëtt bis zum Ofschluss vun der Missioun net iwwerschritt. Am Fall wou et net zu enger Fusioun sollt kommen behalen déi opgestallten Konzepter an Programmer awer hier Richtigkeet.